

ԿԱՐԳ

ԷԼԵԿՏՐԱՄԱՏԱԿԱՐԱՐՄԱՆ ԱՆԽՈՒՍԱՓԵԼԻ ՍԱՀՄԱՆԱՓԱԿՈՒՄՆԵՐ ՊԱՀԱՆՁՈՂ ԻՐԱՎԻՃԱԿՆԵՐՈՒՄ ԷՆԵՐԳԵՏԻԿԱՅԻ ԲՆԱԳԱՎԱՌԻ ԼԻՑԵՆԶԱՎՈՐՎԱԾ ԱՆՁԱՆՑ ԿՈՂՄԻՑ ԻՐԱԿԱՆԱՅՎԵԼԻՔ ԳՈՐԾՈՂՈՒԹՅՈՒՆՆԵՐԻ ԾՐԱԳՐԵՐԻ ՄՇԱԿՄԱՆ

Սույն կարգով սահմանվում են էլեկտրաէներգետիկական համակարգում կրիտիկական (վթարային) իրավիճակները, այդ իրավիճակներում իրականացվող գործողությունների ծրագրերին ներկայացվող պահանջները, ինչպես նաև ամրագրված տեխնոլոգիական և (կամ) վթարային հզորություններ ունեցող սպառողներին այդ ծրագրերում ներառելու պայմանները:

1. Հիմնական հասկացություններ

Սույն կարգում օգտագործված հիմնական հասկացություններն են՝

ամրագրված տեխնոլոգիական հզորություն՝ էլեկտրական հզորության նվազագույն մեծությունը՝ որն անհրաժեշտ է սպառողի տեխնոլոգիական գործընթացը կամ արտադրական ցիկլը սահմանված ժամանակահատվածում անվտանգ ավարտելու համար.

ամրագրված վթարային հզորություն՝ էլեկտրական հզորություն, որը բավարար է տեխնոլոգիական գործընթացը կամ արտադրական ցիկլն ավարտելուց հետո մարդկանց կյանքն ու անվտանգությունը և շրջակա միջավայրի անվտանգությունն ապահովող էլեկտրասարքավորումների աշխատանքը պայմանագրում ամրագրված ժամանակահատվածում ապահովելու համար.

ավտոմատ բեռնաթափման ծրագիր՝ համակարգի օպերատորի և բաշխող ընկերության կողմից կազմված և սահմանված կարգով հաստատված, համակարգային ավտոմատիկայի սարքերով կրիտիկական (վթարային) իրավիճակներում իրականացվող էլեկտրամատակարարման սահմանափակումների ծրագիր.

Էլեկտրամատակարարման սահմանափակում՝ ավտոմատ կամ կարգավարական բեռնաթափման ծրագրի համաձայն սնող գծի անջատում.

կարգավարական բեռնաթափման ծրագիր՝ համակարգի օպերատորի և բաշխող ընկերության կողմից կազմված և սահմանված կարգով հաստատված, համակարգի կամ բաշխող ընկերության օպերատորի հրահանգով կրիտիկական (վթարային) իրավիճակներում իրականացվող էլեկտրամատակարարման սահմանափակումների ծրագիր.

կրիտիկական (վթարային) իրավիճակ՝ էլեկտրաէներգետիկական համակարգում առաջացած այնպիսի իրավիճակ, երբ համակարգի կամ բաշխող ընկերության օպերատորի գնահատմամբ սպառողին մատակարարվող էլեկտրաէներգիայի որակը կամ էլեկտրակայանքների ամբողջականությունն ապահովելու համար էլեկտրամատակարարման սահմանափակումներն անխուսափելի են.

սնող գծի անջատում՝ համակարգային ավտոմատիկայի սարքերով կամ օպերատորի հրահանգով սպառողի էլեկտրամատակարարումը ապահովող էլեկտրահաղորդման գծի անջատում սնող կենտրոնից .

սնող կենտրոն՝ էլեկտրաէներգիա արտադրող, հաղորդող ընկերությունների բաշխիչ սարքավորում, ինչպես նաև բաշխող ընկերության 35« 110 կՎ ենթակայան» որտեղից իրականացվում է սպառողների էլեկտրամատակարարումը:

2. Կրիտիկական (վթարային) իրավիճակներում կիրառվող Էլեկտրամատակարարման սահմանափակումների ծրագրերին ներկայացվող պահանջները

2.1 Կրիտիկական (վթարային) իրավիճակներում էլեկտրամատակարարման սահմանափակումները իրականացվում են ավտոմատ բեռնաթափման և (կամ) կարգավարական բեռնաթափման ծրագրերով» որոնք համատեղ կազմում են համակարգի օպերատորը և բաշխող ընկերությունը՝ ելնելով համակարգի անվտանգությունն ու հուսալիությունն ապահովող հաստատված ցուցանիշներից» ինչպես նաև որոշակի սպառողների էլեկտրամատակարարման առաջնահերթության պայմաններից:

Ավտոմատ բեռնաթափման և կարգավարական բեռնաթափման ծրագրերում չեն ընդգրկվում կայանների սեփական կարիքների պահուստային էլեկտրասնունն ապահովող էլեկտրահաղորդման գծերը:

2.2 Ավտոմատ բեռնաթափման ծրագրերը կազմվում են հետևյալ պայմանների պարտադիր կատարմամբ.

Ա. ամրագրված տեխնոլոգիական և(կամ) վթարային հզորություն ունեցող այն սպառողների նկատմամբ, որոնց էլեկտրամատակարարման սահմանափակումը կարող է հանգեցնել մարդկանց կյանքի և շրջակա միջավայրի համար իրական ու անխուսափելի վտանգի և որոնց համար տեխնիկական կանոնակարգերով չի նախատեսվում սպառողին պատկանող էլեկտրասնունն անկախ աղբյուր, էլեկտրամատակարարման սահմանափակում չի կիրառվում: Այդ բոլոր սպառողների ամրագրված տեխնոլոգիական և վթարային հզորությունների գումարային արժեքների մեծությունը չպետք է գերազանցի համակարգի անվտանգությունն ու հուսալիությունն ապահովող հաստատված ցուցանիշների հիման վրա համակարգի օպերատորի կողմից հաշվարկված մեծությունը.

Բ. «Էներգետիկայի մասին» ՀՀ օրենքի 49-րդ հոդվածով սահմանված սպառողների, ինչպես նաև ամրագրված տեխնոլոգիական և(կամ) վթարային հզորություն ունեցող սպառողների անընդհատ տեխնոլոգիական ցիկլը և(կամ) անվտանգությունն ապահովող սնող գծի անջատումը կարող է իրականացվել ծրագրի վերջին հերթում.

Գ. էլեկտրամատակարարման սահմանափակում կիրառվում է մնացած բոլոր սպառողների նկատմամբ:

Սպառողները, որոնք, ըստ իրենց տեխնոլոգիաների կամ ծառայությունների բնույթի՝ պետք է պարտադիր կերպով ունենան էլեկտրասնունն սեփական անկախ պահուստային աղբյուր, սահմանվում են Հայաստանի Հանրապետության գործող տեխնիկական կանոնակարգերով:

Ավտոմատ բեռնաթափման ծրագրերում ներառված բոլոր սպառողների էլեկտրամատակարարման պայմանագրերում գրառում է կատարվում կիրառվող հերթի վերաբերյալ:

2.3 Կարգավարական բեռնաթափման ծրագրերը կազմվում են հետևյալ պայմանների պարտադիր կատարմամբ.

ա) սույն կարգի 2.2 կետի ա) ենթակետում նշված սպառողների նկատմամբ էլեկտրամատակարարման սահմանափակում կարող է կիրառվել միայն ծրագրի վերջում և օպերատիվ կարգով սպառողի համաձայնությունն ստանալուց հետո.

բ) «Էներգետիկայի մասին» ՀՀ օրենքի 49-րդ հոդվածով սահմանված սպառողների, ինչպես նաև ամրագրված տեխնոլոգիական և(կամ) վթարային հզորություն ունեցող սպառողների անընդհատ տեխնոլոգիական ցիկլը և(կամ) անվտանգությունն ապահովող սնող գծի անջատումը կարող են իրականացվել ծրագրի վերջին հերթում՝ առանց համաձայնեցման կամ նախազգուշացման:

գ) առանց համաձայնեցման կամ նախազգուշացման էլեկտրամատակարարման սահմանափակում կիրառվում է մնացած բոլոր սպառողների նկատմամբ:

2.4 Կրիտիկական (վթարային) իրավիճակների վերացման ընթացքում սպառողների էլեկտրամատակարարումը վերականգնվում է հետևյալ հերթականությամբ.

Ա. սույն կարգի 2.2 կետի ա ենթակետում նշված սպառողների խումբ,

Բ. «Էներգետիկայի մասին» ՀՀ օրենքի 49-րդ հոդվածով սահմանված սպառողների խումբ, ինչպես նաև ամրագրված տեխնոլոգիական և(կամ) վթարային հզորություն ունեցող սպառողների խումբ՝ առնվազն միացնելով անընդհատ տեխնոլոգիական ցիկլը և(կամ) վթարային հզորությունն ապահովող սնող գիծը.

Գ. մնացած բոլոր սպառողներ:

Սույն կարգով իրականացվող էլեկտրամատակարարման սահմանափակումների անընդմեջ տևողությունը չպետք է գերազանցի 4 ժամը:

2.5 Սույն կարգով սահմանված էլեկտրամատակարարման սահմանափակումները կիրառվում են սպառողներին այդ մասին անհապաղ տեղեկացնելու պայմանով: Սպառողների տեղեկացման ձևերը սահմանվում են էլեկտրաէներգիայի մատակարարման պայմանագրով:

2.6 Կրիտիկական (վթարային) իրավիճակներում էլեկտրամատակարարման սահմանափակումների ծրագրերի կիրառման վերաբերյալ որոշումը կայացնում է համակարգի օպերատորը: Այդ իրավիճակներում համակարգի օպերատորը կարող

է կատարել անջատումներ՝ առաջին իսկ հնարավորության դեպքում տեղեկացնելով բաշխող ընկերության օպերատորին:

Կրիտիկական (վթարային) իրավիճակներում բաշխող ընկերության օպերատորը պարտավոր է համակարգի օպերատորի հրահանգով բաշխման ցանցում կատարել էլեկտրամատակարարման սահմանափակումներ:

2.7 Բաշխման ցանցում կրիտիկական (վթարային) իրավիճակներում սպառողների էլեկտրամատակարարման սահմանափակումների ծրագրերի կիրառման մասին որոշում կայացնում և իրականացնում է բաշխող ընկերության օպերատորը՝ սահմանափակումների ծավալների մասին տեղյակ պահելով համակարգի օպերատորին: Էլեկտրամատակարարումը վերականգնվում է համակարգի օպերատորի հետ համաձայնեցնելուց հետո:

2.8 Էլեկտրամատակարարման սահմանափակումների ծրագրերի իրագործման ընթացքում համակարգի օպերատորի և բաշխող ընկերության օպերատորի փոխհարաբերությունները կարգավորվում են «Էներգետիկայի մասին» ՀՀ օրենքով, էլեկտրաէներգետիկական շուկայի կանոններով, էլեկտրաէներգիայի առք ու վաճառքի պայմանագրով և սույն կարգով:

2.9 Տեխնոլոգիական և (կամ) վթարային հզորությունները ամրագրվում են սպառողի և բաշխող ընկերության համատեղ կազմած ակտում (հավելված), որը հանդիսանում է էլեկտրամատակարարման պայմանագրի անբաժանելի մասը:

2.10 Յուրաքանչյուր տարի՝ մինչև դեկտեմբերի 1-ը՝ հիմք ընդունելով սպառողների հետ հաջորդ տարվա համար կնքված պայմանագրերը՝ համակարգի և բաշխող ընկերության օպերատորները համատեղ վերանայում են կրիտիկական (վթարային) իրավիճակներում էլեկտրամատակարարման սահմանափակումների ծրագրերը, որոնք հաստատվում են «Էներգետիկայի մասին» ՀՀ օրենքի 49-րդ հոդվածով սահմանված կարգով: